



Sa laschè ir bain han er las dus deputadas Silvia Casutt (san.) e Cornelia Märchy.



Ina tratga pli buna che l'otra da la cuschina dal «Weisshorn».

FOTOS G. N. STGIER

# Er Arosa ha ina «Wandelhalle»

Sessiun extra muros dal cussegl grond

DA GION NUTEGN STGIER / ANR

■ **Tar la sessiun dal cussegl grond ordvart Cuira tutga er adina in program lateral. Quel sa drizza cunzunt allas instanzas politicas ed al commerzi dal lieu ospitant da la sessiun extra muros per inscuntrar deputadas e deputads. Ad Arosa ha quella entupada gi lieu sin passa 2600 m sur mar.** Er la vischnanca dad Arosa sa dat tutta fadia da porscher a l'entir parlament grischun ina dimora empernaivla. Cun avair gist en vischnanca deputadas e deputads nizzegia er il lieu turistic dal Scanvetg l'ocasiun da preschentar als auts giasts la regiun. Da far valair alla regenza ed a tuts preschents ils giavischs politics è lura er anc in bonus quels dis ch'il parlament è en vischnanca. In bun mument per s'avischinar a las deputadas ed als deputads è sta l'occurrènz al «Weisshorn» da mardi saira. Il restaurant sin passa 2600 m numnan ils indigens er la «Wandelhalle» dad Arosa cun esser quel in lieu singular d'inscunter per discurren, filosofar e sa laschar ir bain.

## 10,5 milliuns francs

Il restaurant da luxus è in'ustria da panorama construì tenor ils plans da l'architecta da renum internaziunal Tilla Theus. La construcziun da quel ha custà

10,5 milliuns e dapi trais onns è quel in dals bajetgs marcants dad Arosa e dal territori da skis. Da stagiun auta l'enviern mangian per di bunamain 1000 personas en quella ustria cun ina vista magnifica e quai en tuttas direzziuns. Schef da la gastronomia è cun *Curdin Luppi* in gastronom da Ftan ed in um che ha fatg sias experientschas en bunas chasas sco per exempel l'hotel Staila a Curia.

## Preschentà numerus projects

Da la partida a l'occurrènz è bunamain stada l'entira prominènz grischuna da las pendicularas. Ils directurs da quels manaschis han lura er nizzegia l'ocasiun da tematisar cun ils represchents da la politica la crisa turistica en noss chantun. En pled e maletg han quels dad Arosa preschentà tuts ils projects realisads ils ultims onns e quels projects che vegnan da preschent realisads sco il nov resort Valsana. 40 chombras e suitas cumpiglia quel, 12 abitaziuns da luxus e locals per butias da tut il gener. Per la realisaziun da quel project segna la Tschuggen Group SA ed ils custs da realisaziun muntan a radund 60 milliuns francs. La vischnanca dad Arosa e las pendicularas han sa laschè gustar quella saira cun servir be il meglier ed il pli bun da cuschina e da tschaler da vin.



Bun appetit er per ils dus deputads Ernst Sax e Curdin Tuor (da san.).



Curdin Luppi (dretg), il schef da la gastronomia dad Arosa Pendicularas SA cun Marc Gisler, il manader dals bajetgs da quel manaschi.



Discussiunar e mangiar en in culp: ils deputads Philipp Gunzinger ed Andy Kollegger e la deputada engiadinaisa Leta Steck (da san.).



Cussegliaer guvernativ Jon Domenic Parolini (dretg) en discurs cun Marcus Gschwend, il mainafatschenta da Grischun Pendicularas SA.



Trais deputads da la Surselva ed in da l'Engiadina: Marcus Caduff, Aurelio Casanova, Mario Salis e Vitus Dermont (da san.).



Deputads e deputada dal Grischun central cun represchents da Lai ed Arosa Pendicularas SA.